

EISE FLOSS **eist Heem zënter 45 Jar...** **d'Geschicht vun engem Jugendzenter**

Januar 1992

Viru 75 Jar, den 28. Januar 1917 gin di Dikricher Scouten als eng Sektioon vum kathoulesche Jünglingsveräin gegrënnt. Si hun hir "Uebungen" am grusse Saal um 1. Stack vum Maison Rouge.

1919 krett d'Baden-Powell Boyscoutsektioon, si sen du zu 23, ee Versammlungslokal op der Kluuster am Härenhaus ënnert de Kaplonswunnungen. Duer gin ech och vun 1936 un an d'Wëllefcher vun der Scoutsektioon St. Laurent.

Nom Krich, am Heerst 1944, installiren d'Scouten sich provisorisch am Veräinshaus an der Jang de Blanne Strooss.

An der Rundstedtoffensiv verbrennt dat fréiert Scoutslokal op der Kluuster a mir plënnere nees op den 2. Stack vum Veräinshaus. Mat deemols 130 Wëllefcher, Scouten, Rover a Chef as et net einfach fer do lansteneen ze kommen.

Den 5. Abrel 1946 gin "d'Scouts Tony Noesen Diekirch asbl." gegrënnt. Domat bleiwt Noesen's Tunn, eise fréieren Sektionsmaster an internationale Commissaire vun de Letzeburger Scouten, deen den 25. Februar 1944 zu Hinzert erschoss gin as, fer ëmmer mat den Dikricher Scouten verbonnen.

E Moont mi spitt gi mir Propriétaire vun engem bal 1,50 ha grussen Terrain am Floss, dee mir vun der Joffer Félicie Leyder, pensionniert Haushaltungsschulléierin, geschinkt kreien.

Den dynamische Sektionsrot mam Aumônier Charles Weiler, dem Sektionsmaster Dr. Albert Mambourg, dem Roverchef Gust Herr an dem Trésorier Frank Gorges, beschléisst... mir bauen am Floss!

De Floss, wu ech als Bouf an den drëssiger Jaren dacks zweemol des Dags d'Kéi an d'Kroechelsgruecht gedriwen hun, sollt mech mäi Leewe laang net mi lass lassen.

Deemols war de Floss nach een einfache Feldwee. No Baustesch hirer Scheier an hirem Gaart mat deene gudden Eerpelen, geet et u mat Wisen, Stécker, Gäärt a Bongerten an d'Flossbaach läft nach laanst de ganze Wee. Wann et och wäit aus Dikrich leit, hot all Mënsch gemengt, deen Terrain su sching an der Sonn mat engem klénge Bësch derbäi, dat wär di idial Plaz fer ee Scoutshome ze bauen. Iwert dem Plangen kënt du och nach eng Jugendherberg mat 60 Better derbäi, fer Jugendgruppen e bëlligen Openthalt an Dikrich z'erméiglichen a mat deene Suën dat Ganzt ze bezuelen an z'ënnerhalen.

Beim Ministère vun der Reconstructioun gi fer 45 000 frs dräi ver-

schidde gruss "Arbeitsdienstbaracken" kaafft, déi nach aus dem Krich zu Schraassig stin. Mat Hëllef vun der Entreprise Schou fer d'Steemetzeraarbichten, e puer däitsche Krichsgefaangenen als Zimmerlett an eise Rover a Chef, apaarti den zwing Louis'en, als Appersmänner, gët am Fréijar a Summer 1947 dichtig am Floss geschafft.

Am Oktober hun di 4 Scoutspatrullen well hir Versammlungen am ënnischten Home an Enn Januar as di 3. Generalversammlung vun eiser asbl. am grusse Sall vum ewischten Home.

De 6. Juni 1948 as dann de memorablen Dag wu mir eise Scoutspark mam "Home Prince Jean" a Präsenz vum Chefscout vun der LBSA dem Prënz Jean a villen aneren Autoritéiten aweien. Moies gin an der Humass di nei Fendelen vun de Wëllefcher a Scouten geseent. Vu lo un lafen d'Scoutsaktivitéiten am Floss, geleet vu 9 Cheftainen a Chef. 45 Wëllefcher, 35 Scouten an 12 Rover hun all Woch hir Versammlungen an d'Lett déi ënnen am Floss wunnen kreien alt heiansdo eppes mat speziell vum "Heemgoen". Déi Zäit soll och en äleren Handweerkman, den och do gewunnt hot, an engem Dikricher Bistro gezeelt hun: "D'Scouten déi se su niddig wi d'Haresplen! Wann ech gewosst hätt datt d'Scouten an de Floss kimen, hätt ech ni duer gebaut." A no eis hun der nach vill an déi Strooss gebaut ... an déi wossten et!

Eis Jugendherberg, déi un d'Zentral vun de Gites d'Etapes ugeschloss as, gët lues a lues bekannt. Newt letzeburger Scouts- a Guiden-truppen hu mir an der grusser Vokanz vill Jugendgruppen aus der Belscht an aus Frankreich.

1951. A schungs gin di ischt Ennerhaltsaarbichten un. Di hëlzen Terrass virum ewischten Home krett e Betonsbuedem. Nei Toiletten gin drënneger ageriicht an un eng Zëtär ugeschloss. Op den defekten Dachpapp um Daach komme gewellt Blechtafelen déi mir bëllig anzwusch kreien. Wochelaang schaffe Rover a Chef all owes bis spitt an Nuecht. Bei Schäinwerferlicht gët Blech goudroniërt an ugeschrauwt. Eemol nuets mengt de Joss zum Louis: "So weess de, wann ee mech fer dës Aarbicht lei gif bezuelen, da kim ech nët!"

Am Juni 1952 kënnt no de Famillje Closter a Kraus d'Famill Marcel Reuter-Souvigné als Concierge an eise Beerg. Si leewen sich siër bei de Scouten an an hellefen mat vill Idialissem 30 Jar laang eis Homer

an Touristen versuergen.

Am Juli steerwt ganz unerwaart eisen Sektionsmaster den Dr Albert Mambourg, deem säi grusse Verdéngst et as dat eis Sektion su siër aus den Nokrichsschwirigkeeten rauskënnst.

Mat villen Aarbichtsstonnen a vill Courage vum deemoligen Roverclan gët aus enger Halschent vum fréieren Toiletteschapp am Bësch eng flott Roverbud mat Schmini. A gudder Erënnierung sen nach di memorabel Uuchten, Causerien a Konter a Mitt Partien.

Dat Jar hu mir 5.460 Iwernuechtungen an eisen Homer an eis Schold geet op 100.000.- frs rof.

An der Nuecht vum 14. op de 15. Februar 1953 kreie mir dann nees en uerge Coup. Eist ënnischt Home, wu d'Wëllefcher an d'Scouter hir Reunionen hun, verbrennt bis op d'Follementsmaueren. E klen-gen Holzuewen am Patrulleneck vun de Ri as d'Ursach vum Brand. Schued fer di vill Aarbicht déi grad d'letz Jar nach dra gemaach gin as an di flott Decoren vun eise fréiere Memberen.

Mee mir stin net laang derbäi ze kräischen. De Neibau gët vum Verwaltungsrot mat sengem neie Präsident dem Professor Ben Molitor autorisiert. D'gët Geld gelingt an d'Scoutshome gët rem opgebaut, des Kiër awer aus Steen a mat der Portierswunning um 1. Stack.

D'Dikricher Gemeng stellt eis en Deel vum Don Suisse-Pavillon am Megonsgaart, do wu lo d'Spillschull steet, fer eis Versammlungen zur Verfügung. D'Wëllefcher installiren sich am Keller bei der Joffer Leyder. Am Heerst 1954 zéie mir well an dat neit Home an. Eis Schold as iwert eng Veerelsmillioun geklommen an d'se keng Suën do fer Miwel ze kaafen. Mir gin eis drun an zammere selwer Dëscher a Bänken, ganz zolitter, d'stinn der nach hätt dervun an der Roverbud. Aus der fréierer Portierswunning am ewischten Home fabriziren eis Spezialisten aus dem Roverclan e rustiken Openthaltssall, den hätt de flottsten Dortoir as.

Am Dezember gët d'Muttergottesstatu "Regina immaculata", déi mir vu gudde Lett geschinkt kreien, ageweit.

Da kommen 10 Jar wu et ëm eise Beerg a seng Homer mi rouig gët. Di al Garde, déi gehollef hot bauen an déi sich och beim Neibau nach emol ferrem um Rimm gerappt hot, gët no a no bestuet a grënnt di 1. Scoutsamicale.

Eisen Här Aumônier Weiler verlisst eis am Heerst 1957. Him se mir e grusse Merci schëllig, hauptsächlich duurch seng Initiativ se mir zu eisem Scoutspark an eisen Homer komm.

Am November 1961 steerwt eis Donatrice d'Joffer Leyder. D'Plack um décke Steen neewt der Entree vum Scoutshome soll eis fer ëmmer un hir Generositéit erënnere.

Déi Zeit krett dat neit Scoutshome lues a lues och bannen an seng definitiv Form. Di enzel Branchen installiren an decoriren hir Räum a mi wi eemol gët eng kleng Strauss bis spitt an d'Nuecht gefeiert.

All Jar as lo eng Botz- a Schaffwoch am Floss a well an de Summermingt zimlich regelméissig gruss auslännesch Colonies de Vacances an eise Gîte d'Etapes kommen, kënnen mir 1965 de Rest vun eiser Schold bezuelen.

Leider hu mir an deene Jaren eis Jugendherberg vernoléissigt, su dat mir bei enger genäer Inspektioun am Heerst 1966 feststellen: Entweder musse mir gruss Modernisierungsarbeitsplanen ënnerhollen oder awer mir man eis Bud zou!! Dorop decidéiert de Verwaltungsrot mat der Amicale 1 de Coup ze woën an all Jar en Deel vum ewischten Home nei ze man. Demanden gin un d'Ministèren, d'Gemeng an d'Oeuvres paroissiales geschriwen.. an d'Subsiden déi dorop kommen oder versprach gin, man eis Courage a mir fuere lass.

1967, wi mir 50 Jar Dikricher Scouten feieren, krett dat Home nei Fënsteren a bausicht Dieren. Di Jaren duerno gët mat Hëllef vun Dikricher Handweerkstett, déi eis ëmmer Scoutspräisser man, de ganzen Rez-de chaussée (Eessraum, Kichen, Dépôt a sanitär Räum) an den 1. Stock (Dortoiren an Openthalsraum) komplett nei gemaach. D'kënnst eng nei Trap bannen, d'gët nei Beedem, Wänn a Plafangen su datt ee vun der aler Barack kaum nach eppes gesäit. De Wee fer rop krett e neie Profil, fer datt och d'Chauffeuren mam L ropkommen, an d'kënnst eng diskret Beliichtung derlaanst. Bei deenen Arbeitsplanen gët dann och endlich d'Jugendherberg un d'Kanalisation ugeschloss.

D'Amicale 1 gët sich alt rëm un den Daach an ersetzt op engem Weekend, eemol am Mä, di 250 m2 blechen Tafelen durch Eternitplatten.

De ganze Mobiliar gët erneiert, deelweis iwer di belsch Jugendzentral, mat der mir zënter 1969 an de Summermingt zesummeschaffen.

Bei dese Verbesserungsarbeitsplanen gët och un d'Isolierung geduecht sudatt mir vu lo un d'Home och am Wanter kënnen opman. Hauptsächlich letzeburger Guiden a Scoutstruppen mee och Schullklassen a Sportsclubben kommen an de Schullvakanten an d'Weekender.

Eist Haus as durch déi Transformationen een einfachen a kam-

mouten Ennerdaach gin an dee mir all Kier nēnnen ee Jugendgrupp ophollen. - D'Home as komplett equippiert fer 50 Lett suwuel watt d'Kichen, den Eessall, den Openthaltssall an d'Schlofräim ubelaangt. Datt et de Jugendlichen an hire Chef bei eis gefällt gesi mir dodurch datt vill Gruppen, Letzebuurger an och Ausländer, ganz regelmēsig ēmmer nees rem kommen.

Den Total vun den Iwernuechtungen zēnter dem Ufank 1948 belāft sich lo op 75.000.

No dēse Strapazen krett eise Floss nees bēsse Rou. Just d'Roverbud gēt nach vergrīssert. Di zweet Halschent, déi ēmmer sollt een Atelier gin, gēt derbāi geholl. Puer Jar duerno installiert eng aner Roverequipe ee Comptoir den se an engem Dikricher Bistro opdreift. Zēnterher as d'Roverbud di idial Plaz fer kleng a gemittlich Uuchten a Feierlichkeeten.

An de siwenziger Jaren erleewt eise Floss e puer gruss Fester. All Memberen vun där Zāit an och d'Noperen, déi an deenen 30 Jar ēmmer mi no un eis erugebaut hun, erēnneren sich bestēmt nach drun:

- am Mā 70 "Flosssprings" mam Indianerduerf an der Westernstad, mam Planwon de Floss op an of a mam Saloon an der Roverbud

- am September 73 "25 Jar Scouten am Floss" mat der flotter Entreespaart, dem Lagerfeier, der Ausstellung an dem Dag vun de fréiere Scouten

- am Mā 75 "Dschungelfest" mat der immenser Piste duurch de Scoutsbeerg an de Wēllefchersbēsch a mat der Stee vun den Dschungeldéieren beim Lagerfeier

- am Juni 79 "Flossix 31-62" d.h. 31 Jar sen di 62jārig Dikricher Scouten well am Floss. - mat engem Rallye Explo-Auto, enger Mass am Bēsch, engem Lagerfeier, enger klenger Ausstellung iwer dee speziellen Anniversaire an natirlich wi ēmmer dem Emgeritts wat Lāif a Sēil zesummen hāllt.

De Floss as awer och Treffpunkt fer vill aner Scoutsaktivitéiten. Su as zēnter Jaren am Heerst ee Nuetsrallye an d'Emgéigend mat Départ an Arrivée am Floss. Déi Equipe wu Minett's Louis derbāi as gewēnt déi Zāit ēmmer. Wi heen du am Januar 1975 unerwaart steerwt, verléiert d'Amicale 1 hiren Animateur an di Dikricher Scouten ee vun hire Besten. Dem Louis war de Floss an d'Scouten un d'Hārz gewues a mir hātten en nach vill gebraucht. Wa mir dēst Jar eemol nuets den 9. Challenge Louis Minette trēppelen, wāte mir a Gedanke bei him sen.

Ufanks den achtziger Jaren gët dann den Duschraum ënnert der Terrass neigemaach an d'Homer no a no baussen a bannen frësch ugestrach. Och dat geet alles net vum selwen an d'fällt och ëmmer en Deel of fer d'Chef, d'Rover an och fer d'Pionniër.

Am Mä 1982 zitt di portugisich Famill Gomes-Andrade an d'Portierswunnung an iwerhëllt su gutt se kann déi net ëmmer liicht Missioun eis Gebäier propper ze halen a mat de Jugendgruppen eens ze gin.

An der 37. Generalversammlung vun eiser asbl. den 1. Februar 84 as eisen Präsident vum Verwaltungsrot de Ben Molitor eng letzte Kiër derbäi. "Mir sollte fer 1985 engem anere säi Poste gin," hot e gemengt an as mi fréi heem gangen. Véier Wochen duerno as e gestuerwen. Dem Ben as eise Grupp ee grusse Merci schëllig. Zënter 1930 war hen derbäi, an di 30 Jar wu heen eise Präsident war, hot heen mat Intressi eis Aarbicht am Scoutissem an am Floss verfollegt. Als ale Scout war hen "ëmmer bereet" an hot déi Demarchen iwerholl déi soss kee wollt man.

Mëtt den achtziger Jaren geet d'Zuel vun eise Wëllefcher an Explorer ferrem an d'Luucht an d'Chef froe no mi engem grusse Sall wu och Aktivitéiten allzesummen méiglich sen ouni dat een den aneren iwerläft.

De neie Verwaltungsrot knéit sich iwer de Problem a well suwuel an der Beergcasse, durch d'Iwernuechtungen, wi an der Gruppecasse, durch eis Baurekichen an al Dikrich, zimlich Fonge sen, fällt siër d'Decisioun fer rechts neewt dem Scoutshome unzebauen.

De Plang, mat engem Sall vu bal 50 m² am Rez-de-chaussée an ënnendrënner engem Ofstellraum fer d'Campingsmaterial an engem Garage fer de Portier a fer d'Maschinen an d'Geschir fer am Beerg an am Bësch ze schaffen, gët eestëmmig approuviert.

An der Zäit as och d'Zouso vun engem Subside vun der Gemeng a vum Ministère de la Jeunesse ukomm, sudatt am Juni 87 den Entrepreneur mat Bauen kann ufinken. D'Handweerkslëtt lossen eis net am Stach an Enn-Januar 88 hu mir di 47. Generalversammlung am neie Sall. Am Laf vum Jar gët e ganz färdig. Dem All seng Schmini an de grusse Schaf laanst di eng ganz Säit sen apaarti gutt gero-den. T'as e gemittliche Sall gin den och aner Veräiner, mat deene mir vill zesummeschaffen, mol geläentlich kënne benotzen.

An der selwichter Zäit entsteet aus dem fréiere Sall vun de Patrullenecker ee praktischen Atelier mat zolitten Dëscher wu och 12 Lett kënne hummeren a bastelen ouni sich ze hënnere. Enn

November gin dann di zwu Entreprises ageweit, wi dat sich passt: well lo hu mir Plaz fer eis 133 Memberen.

Zwee Jar drop as den Tour nees um ewischten Home. Virlanst as wuel di sching gruss Terrass, mee wann et reent da gët ee naass. D'Fiichtigkeet zitt derduurch a mëcht ënnendrenner vill Misär. Jarelaang gët well un dem Problem gedoktert. En Daach mat durchsichtige Pannoën misst d'Lisung sen. Och duefir fanne mir di richtig Lett suwuel fer d'Statik ze berechnen, wi och fer d'Konstruktioun ze man. Am September 90 geet et lass an am Oktober kann ee well rouig am Reen op der Terrass setze bleiwen well t'as su flott wann et rabbelt wi an engem Zelt.

D'Jar 1990 hot eis awer och eng fatzig Iwerraschung bruecht. De Sturem vum 1. Määrz hot eise Bësch och ze pake kritt a frot net wi. Di schingst Bäm leiën ëm an e puer Akaziën hinke ganz geféierlich iwer der Roverbud. Et as keng einfach Aarbicht an deem Hank, mee mat Hëllef vun de Bëschaarbichter vun der Gemeng, engem fréiere Scout mat sengem Papp an hire Maschinnen gi mir déi Saach och Meester. Lo hu mir Holz fer an eis zwu Schminiën fer opmanst zéng Jar, mir bräichte just nach een deen et erbäi bréngt an dem Feier noleet.

1991 as da rëm d'Rei um Ustrach suwuel bausse wi bannen. De Joss an de Mars haten sich virgeholl dat nach eemol an hirer Pensioun ze man. De Floss hot der Fënsteren an hëlze Wänn vill, an di zwing gin sich net bis se de ganzen Tour färdig hun. Wi du och nach di nei Herbergsfamill Do Paço fest mat upäkt, gët d'gruss Botz an engems gemaach.

Wa mir lo nach am Fréijar d'Lächer am Wee an un der ewischer Fassad gefléckt kreien, nach bëssen ënnert de Béi an d'Rei man, am Bësch raumen an de Pad opkappen, dann as eise Floss prett fer de Jubiléumsprogramm.

D'Aarbichten gufe nach laang net all opgezeelt, mee alleguer deenen déi egal wini, wu a wivill dobäi gehollef, hun séif heimat merci gesot a mir wäre fru fer si dëst Jar eemol do rëm ze gesinn.

Merci och allen Instanzen déi eis an all deene Jaren ënnerstëtzt hun. Apaarti eiser Gemeng an hiren technische Servicer. Mir hun se net ze dacks geplot mee si hun awer och ni nee gesot.

Merci dem Ministère de la Jeunesse, dem Ministère du Tourisme, eisen Oeuvres paroissiales, déi mi wi eng Kiër eis Caisse gestäipt hun. Och dem Syndicat d'Initiative fer seng Publicitéit a Propaganda fer eist Home.

Merci den Handweerkselett, d'waren bal ëmmer diselwigt déi mir ugesprach hun, an déi no der Scoutsmentalitéit "aus alles lisst sich nach eppes man" gehollef hu kalenneren fer datt et su bëllig wi méiglich sollt gin.

Merci och de Noperen fer hirt Versteesdemich. Si hun sich lo un eis gewinnt a mir komme gutt maddeneen zuwee.

Wee mein Artikel bis heer geleest hot, dee muss ich felicitiren an dee versteet och dat mir Dikricher Scouten huffrig op eise Floss sen.

1992 - den Dikricher Scouten hire Floss besteet lo 45 Jar:

- mi wi 157.000 Iwernuechtungen hu jung Lett aus ville Länner an der Zäit bei eis verbruecht an hu sching Erënnerungen vum Floss a vun Dikrich mat heem geholl
- mi wi 1000 Jungen a Meedercher haten zënterheer als Wëllefchen, Explorer, Pionniër, Rover, Aumônier, Cheftaine a Chef oder als Member vun enger vun eisen Amicalen flott Aktivitéiten an eisem Beerg.

An deene 45 Jar guf eise Floss gutt versuergt!

Ech wënschen him dat och fer di Jaren déi lo kommen, da wärte nach vill Jugendlicher fru Stonnen do erleewen.

Marcel Thillen
Präsident vum Verwaltungsrot